



## Pantai Teluk Nipah bakal lenyap 10 tahun lagi - Kajian UTP

Oleh [Muhamad Lokman Khairi](#) - Januari 4, 2023 @ 4:51pm  
[bhnews@bh.com.my](mailto:bhnews@bh.com.my)



Dr Teh Hee Min (kanan) ketika lawatan lapangan di Pantai Teluk Nipah, dekat sini sempena Projek Mewujudkan Persekutaran Pantai yang Lestari Pangkor. - Foto NSTP/L Manimaran

LUMUT: Pantai Teluk Nipah di Pulau Pangkor bakal 'ghaib' menjelang 2032 jika tiada inisiatif diambil bagi mengawal hakisan pantai di kawasan terbabit.

Perkara itu dinyatakan Pensyarah Kanan Fakulti Kejuruteraan Sivil dan Alam Sekitar, Universiti Teknologi PETRONAS (UTP), Dr Teh Hee Min ketika lawatan lapangan di Pantai Teluk Nipah, dekat sini sempena Projek Mewujudkan Persekutaran Pantai yang Lestari, semalam.

Menurutnya, berdasarkan penyelidikan lapangan di Pantai Teluk Nipah yang dilaksanakan pihaknya sejak 2019, ombak kuat mengakibatkan kawasan pantai berpasir terhakis tiga meter (m) setiap tahun.

"Ini bermakna garis pantai semakin berkurang dan ombak yang kuat semakin menghampiri bangunan di pesisir pantai itu.

"Situasi ini boleh mengancam nyawa dan ekonomi peniaga yang mempunyai kedai di sepanjang pesisir Pantai Teluk Nipah.

"Kini, kawasan peniaga kritikal kerana terdapat struktur kedai yang sudah pun dihempas ombak," katanya.

Menurutnya, langkah kawalan mesti diambil bagi mengelakkan sebarang insiden yang tidak diingini berlaku.

Sementara itu, Jurutera Daerah Jabatan Pengairan dan Saliran (JPS) Manjung, Mohd Shamimi Mohd Tahir, berkata pihaknya sudah mensyaratkan rizab bagi pantai berpasir sepanjang 60m.

"Ini bermaksud, sebarang pembinaan kekal dalam jarak 60m itu dilarang.

"Jika kita lihat, perkara ini tak dapat dipatuhi. Faktor utamanya adalah hakisan pantai kerana dari tahun 1990-an hingga kini, hakisan itu sudah pun melebihi jarak 60m.

"Pihak JPS sedang merancang usaha bagi mengekalkan semula rizab 60m di kawasan pantai berpasir supaya garis pantai yang sedia ada dapat dikekalkan," katanya.

Ditanya mengenai risiko jika garis pantai tidak dapat dikekalkan, Mohd Syamimi menjelaskan negara bakal kehilangan daratan dan ia mengancam keselamatan orang awam.

Dalam pada itu, Setiausaha Majlis Perbandaran Manjung, Helmi Arifin, berkata ketika kedai di sepanjang pesisir Pantai Teluk Nipah dibina dahulu, ia mematuhi syarat rizab JPS.

"Namun akibat hakisan pantai, garis pantai itu semakin mendekati barisan kedai terbabit. Ruang perniagaan di Teluk Nipah sedang dibangunkan supaya peniaga tadi boleh dipindahkan.

"Dengan ini, kawasan Pantai Teluk Nipah dapat dikembalikan kepada fungsi asalnya iaitu kawasan perkelahan," katanya.

Menurutnya, peniaga yang mempunyai kedai di sepanjang pesisir Pantai Teluk Nipah akan terbabit dalam proses pemindahan apabila projek itu siap kelak.

"Bazar Perniagaan Teluk Nipah dijangka siap Jun tahun ini, jadi peniaga tidak perlu risau mengenai kelangsungan perniagaan mereka. Rundingan bersama peniaga sudah bermula," katanya.